



Province of the
EASTERN CAPE
EDUCATION

**NATIONAL
SENIOR CERTIFICATE**

IBANGA 12

SEPTEMBER 2010

ISIXHOSA ULWIMI LWASEKHAYA – IPHEPHA LESIBINI

AMANQAKU: 80

IXESHA: 2½ iiyure



Olu viwo lunamaphepha angama – 20.

Akuvumelekanga ukufotokopa eli phepha

Tyhila iphepha

IMIYALELO NENGACISO

- 1 Nceda ufunde le miyalelo phambi kokuba uqale ukuphendula imibuzo.
- 2 Musa ukuzama ukufunda lonke iphepha. Jonga kwisiququlatho esikwiphepha elilandelayo uze uchonge imibuzo ebuzwe ngeetekisi ozifundisiweyo kulo nyaka. Emva koko yifunde le mibuzo uze ukhethe leyo unqwenela ukuyiphendula.
3. Eli phepha linamacandelo amaTHATHU

ICANDELO A:	Isihobe	(30)
ICANDELO B:	Inoveli	(25)
ICANDELO C:	Idrama	(25)
4. Landela imiyalelo esekuqaleni kwicandelo ngalinye ngocoselelo.
5. Kulindeleke ukuba uphendule imibuzo emihlanu iyonke:

Imibuzo emithathu kwicandelo A; omnye kwicandelo B nomnye kwicandelo C.

Sebenzisa uluhlu lokukhangela (itshekhlisti) olukwiphepha lesine lokukunceda.
- 6 Nombola iimpendulo zakho ngokwendlela ekunonjolwe ngayo imibuzo kwiphepha lemibuzo
7. Icandelo lemibuzo NGALINYE liqale kwiphepha ELITSHA.
8. Bhala ngokucocekileyo nangokucacileyo.
9. Yaba ixesha lakho ngolu hlobo:

ICANDELO A:	malunga nama – 40 emizuzu
ICANDELO B:	malunga nama – 55 emizuzu
ICANDELO C:	malunga nama – 55 emizuzu

Iphepha lesiqulatho

Eli phepha liza kunceda abafundi bakwazi ukukhetha imibuzo abafuna ukuyiphendula ngaphandle kokufunda lonke iphepha.

ICANDELO A: ISIHOBE		
Imibongo emiselweyo: Phendula NAYIPHI na imibuzo emiBINI		
INOMBOLO YOMBUZO	UMBUZO	AMANQAKU
1. (Imfundo)	Umbuzo omde	10
OKANYE		
2. (Inkululeko)	Umbuzo omfutshane	10
OKANYE		
3. (UMBambushe)	Umbuzo omfutshane	10
OKANYE		
4. (Andiva Makwedini)	Umbuzo omfutshane	10
Umbongo ongamiselwanga: Phendula NAWUPHI OMNYE		
5. (Umzali)	Umbuzo omde	10
OKANYE		
6. (Umzali)	Umbuzo omfutshane	10

ICANDELO B: INOVELI		
Phendula umbuzo OMNYE .		
7. (Nyana Wam! Nyana Wam!)	Umbuzo omde	25
OKANYE		
8. (Nyana Wam! Nyana Wam!)	Umbuzo omfutshane	25
OKANYE		
9. (Ukhozi olumaphiko)	Umbuzo omde	25
OKANYE		
10. (Ukhozi olumaphiko)	Umbuzo omfutshane	25

ICANDELO C: IDRAMA**Phendula umbuzo OMNYE.**

11. (A-a-a! Jongumsobomvu)	Umbuzo omde	25
OKANYE		
12. (A-a-a! Jongumsobomvu)	Umbuzo omfutshane	25
OKANYE		
13. (Amaza)	Umbuzo omde	25
OKANYE		
14. (Amaza)	Umbuzo omfutshane	25

QAPHELA: KUMACANDELO B no C, phendula umbuzo omde omnye nombuzo omfutshane omnye

Itshekhlisti:

Kunyanzelekile ukuba uqwalasele olu luhlu lulandelayo ukuze uqiniseke ukuba ukhethe imibuzo ngendlela eyiyo.

ICANDELO	AMANANI EMIBUZO	INANI LEMIBUZO EMAYIPHENDULWE	TIKISHA NGASEZANTSI
A: Isihobe (Imibongo emiselweyo)	1-4	2	
A: Isihobe (Umbongo ongamiselwanga)	5-6	1	
B: INoveli (umbuzo omde OKANYE umbuzo omfutshane)	7-10	1	
C: Idrama (umbuzo omde OKANYE umbuzo omfutshane)	11-14	1	
QAPHELA: KumaCandelo B no C, phendula umbuzo OMDE UBE MNYE nombuzo OMFUTSHANE OMNYE.			

ICANDELO A : ISIOBE**IMIBONGO EMISELWEYO.**

VUKANI MADODA KUSILE – IZIBONGO NAMANQAKWANA: Inggokelela yababhali.

IMIYALELO : Kweli candelo kubuzwe imibongo emiNE emiselweyo NOMNYE ongamiselwanga. Umlingwa kulindeleke ukuba aphenhule imibuzo emiBINI ebuzwe kuyo nayiphi na imibongo okanye izibongo ezimiselweyo; KUNYE nombuzo omnye kumbongo ongamiselwanga.

QAPHELA : Umbuzo ongombongo ongamiselwanga KUNYANZELEKILE ukuba uwuphendule. Qiniseka ukuba uphendule imibuzo emiTHATHU kweli candelo.

UMBUZO 1 (Umbuzo omde)

Fundisisa lo mbongo ulandelayo uze ubonise ngeengongoma ezilishumi kuphela indlela ulwimi olusetyenziswe ngayo ukuphuhlisa umxholo walo mbongo. Ubude bempendulo mabube phakathi kwe-190 ukuya kwi-240 lamagama.

(10)**IMFUNDO: Ngu N. Shasha**

- 1 Imfundo sisixhobo sobomi
- 2 Liqulelingazange loma nanini
- 3 Ngumlambo onzulu ozel'indyabo
- 4 Sisibane esikhulu esisus'ubumnyama
- 5 Ndiyayithand'imfundo kub' izis 'ukhanyo.
- 6 Inkubeko izalwa yimfundo
- 7 Kunamhla sith'izandla ziyahlambana
- 8 Sihlamban'imihlana sicheban'iinduma
- 9 Sicumz'ubundlobongela sixhag'uthando
- 10 Sixabisene, siyimbumba yamanyama.
- 11 Imfundo sisikrweqe sokugxoth'indlala
- 12 Apho kulel'ikati eziko kuzal'ingqumbo,
- 13 Kugqube umoya wesibaya.
- 14 Ulwazi'oluphangaleleyo luza nophuhliso,
- 15 Uchum'umhlaba kuhluthwe, kuteywe.

OKANYE

UMBUZO 2 (Umbuzo omfutshane)

Yonwabela lo mbongo ulandelayo uze uphendule imibuzo elandelayo.

INKULULEKO: Ngu S. Mkiva

- 1 Ziinzima ziintsizi,
- 2 Ziincwina yindlala,
- 3 Yimikhuhlane zizifo,
- 4 Yimingcwabo ziingozi.

- 5 Zizijwili kuyavukelwa,
- 6 Ziintsizi kuyavalelwana,
- 7 Zizagwintyi zeenyembezi.
- 8 Zizivubeko zemivumbo.

- 9 Ixesha lemka nethuba,
- 10 Ixhonti labona ixhoba.
- 11 Ixhoba laxhoma lamisa,
- 12 **Ixhoba** laxhokonx'ixhonti.

- 13 Yadla imbuzi nengonyama,
- 14 Zatlala iimpuku nekati.
- 15 Latyeb'ilizwe, izilwanyana nabantu,
- 16 Yaluthando kummelwane nakummelwane.

- 2.1 Xela umahluko ngokwentsingiselo eveliswa ngamagama abhalwe ngqindiili kwisitanza sesithathu. (2)
- 2.2 Safobe sini esiqaqanjisiweyo kwiivesi ezimbini zokuqala kwaye sisetyenziselwe ukuphuhlisa ntoni malunga nomxholo? (2)
- 2.3 Ngqamanisa inkcaza EKULUHLU A nebinzana/umqolo OKULUHLU B (3)

A	B
2.3.1 Intlutha/Indyebo	A Yaluthando kummelwane
2.3.2 Imvano/Imvisiswano nomntu obelutshaba lwakho	nakummelwane
2.3.3 Intsebenziswano/Kwakheka ubuhlobo	B Latyeb'ilizwe, izilwanyana nabantu
	C Zatlala iimpuku nekati

- 2.4 Loluphi udidi lombongo olu? (1)
- 2.5 Hlobo luni lophindaphindo olubonakaliswa ngamagama akrwelelwe umgca ngaphantsi? Xela lusetyenziselwe ntoni. (2)

[10]**OKANYE****Akuvumelekanga ukufotokopa eli phepha****Tyhila iphepha**

UMBUZO 3 (Umbuzo omfutshane)

Fundisisa lo mbongo ulandelayo wandule uphendule imibuzo elandelayo.

UMBAMBUSHE: Ngu S. E. K. Mqhayi

- | | |
|----|-------------------------------|
| 1 | Akonanga; wonakele |
| 2 | Loo nyanis'ibonakele. |
| 3 | Kone iziphathamandla, |
| 4 | Zakutyhefa, zakuphandla |
| 5 | Akonanga nto kaMlawu, |
| 6 | <i>Ngokuwenza loo mzekelo</i> |
| 7 | Eli qhina linengozi. |
| 8 | Ziwa kulo zonk'iinkosi |
| 9 | limbali zibalisiwe, |
| 10 | lincwadi zifundisiwe |
| 11 | Le nyaniso iyatyandwa |
| 12 | Inkos'ifa ngezithandwa |
| 13 | Izithandwa zabumini |
| 14 | Ezinobunginingini |
| 15 | Ezithetha kom'amathe |
| 16 | Ze ngokuhlwa ziyizonde |

3.1 Xela uhlobo lophindaphindo olubonakaliswe ngamagama abhalwe ngqindilili. (1)

3.2 Khetha kulo mbongo umgca/umqolo otolika ezi nkcaza zilandelayo

3.2.1 Abantu abaninzi beyela kuloo mgibe

3.2.2 Ukuyjikela into ubuyithethile (2)

3.3 Ukuba nobunginingini ngokwalo mbongo ingaba kuthetha: KHETHA IBE NYE:

3.3. Ukuthetha ungayeki

1

3.3. ukungabinanyani

2

3.3. Ukuthetha into engavakaliyo

3

(1)

3.4 Igama 'iziphathamandla' libhekisa koobani ngokwalo mbongo? (1)

3.5 Le nto ka Mlawu kuthethwa ngayo kulo mbongo ingaba ibambe esiphi isikhundla kwesi sizwe? (1)

3.6 Ucinga ukuba ubhalwe xesha nini ezimbalini lo mbongo? Zixhase. (2)

Akuvumelekanga ukufotokopa eli phepha

Tyhila iphepha

3.7 Nguwuphi lo mzekelo athetha ngawo umbhali kumqolo wesi – 6? (1)

3.8 Chonga umqolo obonisa isibaxo kwisitanza sesi – 4. (1)

[10]

OKANYE

UMBUZO 4 (Umbuzo omfutshane)

Funda lo mbongo ulandelayo uze uphendule imibuzo elandelayo.

ANDIVA MAKWEDINI: Ngu D. Hohu

- 1 Yeha-! Low'umzi wakh'uphatha phathw'etyhini,
- 2 **Ungqengqa kwamhloph'akazili ngulwabilwabi**
- 3 Wonqunyul'iimpond'axel'uSamson.
- 4 Gqalani makwedin'isiko yinkathazo
- 5 Isiko ngumlilo wegquba
- 6 Asinithwese zidanga zakutsib'ulwandle
- 7 Singanithwese zidanga zakusus'imveli
- 8 Awu madoda yintoni nal'iyimfundo kumntu'omnyama?
- 9 Sibathwes'izidanga suke bazalel'endle
- 10 Namhlanj'ubudoda bungaphantsi nakwisilivere
- 11 Yingqayi-ngqayi kwiimagazini
- 12 Kazi sisingise phi– na
- 13 Ndlw'emnyama?
- 14 Naze nandosul'ukubila
- 15 Mh!!!

4.1 Cacisa ukuba umqolo obhalwe ngqindilili unika mfanekiso-ngqondweni mni? (2)

4.2 Chonga umqolo kulo mbongo obonisa oku:

4.2.1 Isiko liyingozi xa lingenziwa ngendlela efanelekileyo (1)

4.2.2 Ubudoda abunaxabiso mva nje. (1)

4.3 Nika umfanekiso ntelekelelo oboniswa ngumqolo okrwelelwe umgca ngaphantsi. (2)

4.4 Umqolo othi: 'Naze nandosul'ukubila' uthetha ukuthi;

4.4.1 Nindimangalisile/nindincamisile

4.4.2 Nindenze ndaphola

4.4.3 Nindonwabisile (1)

4.5 Xa uwufunda lo mbongo ungathi injani imo mphefumlo yombhali? Zixhase. (2)

4.6 Mfundiso ni edluliswa ngumbhali kulo mbongo? (1)

[10]

KUNYE

Imibongo engamiselwanga

Kunyanzelekile uphendule umbuzo omnye kolu hlobo lwemibongo.

UMBUZO 5 (Umbuzo omde)

Funda lo mbongo ulandelayo uze uphendule umbuzo osezantsi kwawo.

UMZALI: Ngu W. N. Mbovane

- 1 Ufukam'axel'isikhukukazi
- 2 Ukufukamel'usapho lwakhe
- 3 Ugempez'abe sisiphekepheke
- 4 Yakulal'ikat'eziko
- 5 Afun'**umfunzelo** wezo ntsizana
- 6 Ukhand'unyawo kugqobhok'umhlaba
- 7 Ukufun'uncedo apho lungakhona
- 8 Ngeemini zomkhuhlane nentlupheko
- 9 Lingomso elifik'izolo
- 10 Kub'uzazi tanci ezendlu yakhe
- 11 Ngunothwal'impahlana oqhelene neenzima
- 12 Kuze kuqagambe ikamva lesiqhamo sakhe
- 13 Libhelempe elikhala kungafi mntu
- 14 Kub'ungxol'exolis'elungis'isimilo
- 15 Ligqang'elinethinz'elingarhawuli mntu
- 16 Kodwa luzifudumeza kulo usapho
- 17 Lilitye elimtyuba lokulola
- 18 Kuba luzilola kul'usapho
- 19 Kuxobuk'izigulo nentlupheko
- 20 Kazi liyintoni na ikhaya ngaphandle kwakhe

Umbhali kulo mbongo usebenzisa imifanekiso- ntelekelelo eqaqambisa indima ebalulekileyo edlalwa ngumzali. Cazulula kangangamagama angama 190-240 ubude indlela le mifanekiso – ntelekelelo eyiphembelela ngayo intsingiselo yalo mbongo.

[10]

OKANYE

UMBUZO 6 (Umbuzo omfutshane)

Phendula imibuzo elandelayo esekwe kumbongo okumbuzo 5

- 6.1 Safobe sini esisetyenziswe kumqolo we-6 kwaye sisetyenziselwe ukuphuhlisa ntoni? (2)
- 6.2 Umfanekiso ngqondweni ozotywa kumqolo 1 ubonisa:
- 6.2.1 Ukunceda
- 6.2.2 Ukugcina
- 6.2.3 Ukukhusela (1)
- 6.3 Beka elinye igama endaweni yelibhalwe ngqindilili kwistanza 1, elithetha into enye nalo ngokomxholo wombongo. (1)
- 6.4 Yinyani okanye bubuxoki ukuba umzali uxobula izigulo nentlupheko? (1)
- 6.5 Cacisa lo mqolo 'Ligqang' elinethinz' elingarhawuli mntu'. (2)
- 6.6 Yintoni injongo yombhali ngokusebenzisa uhasaniso kumqolo okrwelelwe umgca ngaphantsi? (2)
- 6.7 Chonga umqolo obonisa ukuba iintetha zomzali azibulali. (1)
- [10]

AMANQAKU ECANDELO A: 30**ICANDELO B: INOVELI****IMIYALELO**

- Kweli candelo kubuzwe iinovelis ezimbini.
- Khetha imibuzo kwinoveli oyifundisiweyo.
- Kwinoveli nganye kubuzwe imibuzo emibini, oMDE noMFUTSHANE, ukususela kumbuzo wesi – 7 ukuya kumbuzo 10.
- Khetha umbuzo ube mnye uwuphendule.
- **QAPHELA** : Ukuba ukhethe umbuzo OMDE kwinoveli, khetha OMFUTSHANE kwicandelo C. Ukuba ukhethe umbuzo OMFUTSHANE kwidrama, khetha umbuzo OMDE kwicandelo B. Ubude bombuzo omde buphakathi kwama-340 nama -390 amagama.

Nyana Wam! Nyana Wam!: Ngu W. T. TAMSANQA**UMBUZO 7** (Umbuzo omde)

‘Abanye abantu bafana nqwa nabantu athetha ngabo uShakespeare, umbhali waseMangesini esithi bazalwa necephe lesilivere lijinga emilonyeni yabo’. Bhala isincoko esiphakathi kwamagama angama-340 – 390 ngale ntetho, **ungqine** ubunyani bayo ngokubhekiselele kuMangaliso mhla wathi cakatha unyawo lwakhe eJan Smuts evela eNgilane de abe uyagoduka ukubuyela eGCUWA.

(25)**OKANYE****UMBUZO 8** (Umbuzo omfutshane)

Funda esi sicutshulwa silandelayo uze uphendule imibuzo elandelayo.

ISICATSHULWA A

“Lathi liphuma elangoMvulo waye uThole eyibophe yancinci eyakhe engasafuni kuva nento ngeBhayi.

Waya esitishini seeTeksi efuna ukubamba eziya kwesikaloliwe abambe osinga emaXhoseni. Uthe esazula-zula ekhangela weva ngelizwi likaThemba limkhwaza, ‘Yintoni ntang’am iyaphi le ndlela?’ Wangangavala iindlebe akuliva elo lizwi. Lazinga ilizwi limkhwaza, wada waneentloni wabona ukuba makangambonakalisi ukuba ucinga ntoni na ngaye.

‘Mfondini ndithetha nawe, ndithi iyaphi na le ndlela?’ uphinde watsho ebuza uThemba. ‘Tyhini! Nguwe ntang’am?’ Andiqondi ndiva nje kwamntu ukhwazayo. Kaloku kuyaphithizela abantu baninzi. ‘Ndiyagoduka,’ watsho ukuphendula uThole”.

‘Khwela sihambe yiyole imoto besifuna nje umntu abe mnye,’ watsho uThemba evula ucango lwemoto.

- 8.1 Kwenzeke ntoni kuThole sele engasafuni nokuva nento le ngeBhayi nje? (2)
- 8.2 Ingaba iyenzeke into yokuba uthi xa ukhwazwa ngumhlobo wakho unge ungavala iindlebe? Zixhase (2)
- 8.3 Igama uThole alisebenzisayo umbhali ngokwalapha kwisicatshulwa lihamba lihambe litshintsha apha ebalini. Litshintsha xa kuphi? Nika iingongoma zibe MBINI malunga nonobangela wokutshintsha kwalo. (3)
- 8.4 Ngqina okanye uphikise uluvo oluthi, “UThole uyoyiswa kukuthatha izigqibo ezizezakhe,” uthathela kwesi sehlo sale mini. (2)
- 8.5 Ungamcebisa ntoni umntwana ova ngabahlobo bakhe yonke into ayenzayo. (1)
- 8.6 UThole akaqali ukuzibona sele ekhweliswa emotweni ngabahlobo bakhe. Ebekhweliswa nini, xa ebevela phi? (2)

- 8.7 Xela ukuba iyaphi le moto ayikhweleyo? (1)
- 8.8 Amazwi kaThole athi, “ndiyagoduka” asebenze njengesigqebelo, xela ukuba kutheni luyinyani olu luvo? (1)
- 8.9 Yithi gqaba-gqaba ngeziqhamo zolu hambo ngeengongoma ezintathu (3)
- 8.10 Xela imfundiso oyifumeneyo kwizenzo nemikhwa kaThole nabahlobo bakhe. (2)
- (18)

ISICATSHULWA B

“Masikhe silande eli bali lalo chwenene womfundisi ukuba lisuka phi na. Ingaba wazalwa engumfundisi na? Impendulo ithi, ‘Hayi.’ Ukuza kufika kweli nqanaba akulo ibe yimigudu namahla-ndinyuka abantu abaninzi esiza kuva ngabo apha ebalini. Omnye wabo bantu nguFikizolo lo namhla simva ebhomboloza ekhwaza esithi, ‘Nyana wam! Nyana wam!’ Abanye ke sobuya sive ngabo ngokuhamba kwebali.”

- 8.11 Yinyani/asiyonyani ukuba kulungile umntu (uThole) aqale athwaxwe bubomi ukuze afikelele kwisigqibo esisiso. Zixhase. (2)
- 8.12 Nika imizekelo ibe MITHATHU yala mahla-ndinyuka kuthethwa ngawo apha ebalini. (3)
- 8.13 Ubhombolozelani uFikizolo? (1)
- 8.14 Ngaphandle kukaFikizolo ngubani omnye umlinganiswa obe negalelo elikhulu ekuzameni ukuba uThole ade afikelele kweli nqanaba akulo ngoku? (1)
- (7)
- (25)

UMBUZO 9 (Umbuzo omde)

UKHOZI OLUMAPHIKO: Ngu N.Saule

Olunye uphawu lomlinganiswa oyintloko kukuba **ebunzimeni uba liqhawe**. Hluza ubunyani bolu phawu ngokubhekiselele kumlinganiswa uMfazwe, ubhale kangangamagama angama 340-390 ubude.

(25)

OKANYE

UMBUZO 10 (Umbuzo omfutshane)

Funda ezi zicatshulwa zilandelayo uze uphendule imibuzo elandelayo.

ISICATSHULWA A

Kuthe kusisa ngosuku endandibanjwe ngalo, yabe seyithe ndii elokishini into yokuba zindithathile izinja zasemthethweni. Ulunywe kwangoko umzi, yankulu incwina, lathi lisithi thaphu ilanga kwabe sekucacile ukuba kuza kuqhawuka kuhlangu. Le nto ibonakele kwindlela abantwana baseFunda, isikolo esiya sam, abahambe ngayo ukuya esikolweni. Bahambe beziziqhu ngeziziqhu. Zithi zakudibana zenze esinye esikhulu, neso sakudibana nesinye sikhule ngendlela eyoyikisayo. Bathe besiya kungena esikolweni, babe sebelibubu elinye elimnyama, isitsho ingoma, **beqhuqha ukubaleka oku kwenkwenkwe etshotshayo**. Uphume umzi wathi chasi, noTat`uGaba akabin`akuzinza, wafana wayama ngocingo amehlo ewabhekise kwicala elinesikolo esibusithela apho emzini wakhe. Ibe sisidala bengenile kumasango esikolo kuthe cwaka, kuthe xhonkxosholo naselokishini, kungekho nto ivakalayo. Kwalile xa abantu sebencamile bebuyela ezindlwini zabo, zvakala ezokuba kuvingcelwe iititshala. Abantwana bayazitshutshisa ukuba ziye kugunyazisa abasemthethweni ukuba ndikhululwe. Ithe yakwala inqununu ngelithi umcimbi awukho zandleni zayo, yaqala inkathazo, abantwana baphuma izimilo, bafuna kuyo esiqwini. Umfo omkhulu, iTshawe, inqununu le ke, uthethe bada bamamela abafundi ebaxelela ukuba bangambulala yena, kodwa loo nto ayisoze yenze ukuba ndiphume, ngoko ke makufunwe cebo limbi. Ziwe ngokuwa iintetho kujikelezwa ndaweni nye, kwada kwafuneka kuchithakalwe ngentlazane kubuywe kuzokugqityezelwa ingxoxo”.

- 10.1 Yintoni ebangela ukuba umbalisi athi abasemthethweni “zizinja” ngokwesi sicutshulwa? Zixhase. (2)
- 10.2 Caphula nawuphi na umqolo obonisa uvakalelo kuluntu lakwaQaka ngenxa yesi senzo sokuvalwa kwalo mlinganiswa. (2)
- 10.3 Ukuqhawuka kuhlangu ngokwesi sicutshulwa ingaba kuthetha:
 - 10.3.1 Ukwahlukana nimana nidibana
 - 10.3.2 Ukuba kuza kwaziwana
 - 10.3.3 Akuzukudityanwa konke konke (1)
- 10.4 Lo mlinganiswa kuthethwa ngaye apha ufundisa ziphi izifundo kwesi sikolo iFunda? (1)
- 10.5 Safobe sini esikumqolo obhalwe ngqindilili kwaye sisetyenziselwe ukubonisa ntoni? (2)

- 10.6 Esi siganeko sibonisa abafundi betoyitoya sikukhumbuza wuphi unyaka apho abafundi babengalawuleki ngexesha lengcinezelo eMzantsi Afrika. (1)
- 10.7 Kuxesha nini ngentlazane? (1)
- 10.8 Sizathu sini esibangele ukuba bathi abafundi bebuyela kwiingxoxo zabo malunga nokuvalelwa kotitshala wabo kodwa babuye sele uphethukile umoya wabo kwinto obuyiyo kuqala? (2)
- 10.9 Nxulumanisa ngokwakwiscatshulwa eli gama 'Ngcothoza' nomnye waba balinganiswa balandelayo.
- 10.9.1 Tat'uGaba
- 10.9.2 Mfazwe
- 10.9.3 Hlathi (1)
- 10.10 Sebenzisa ulwazi lwakho lwencwadi uxele ukuba kungani ukhethe loo mlinganiswa umkhethileyo kumbuzo ongasentla. Nyathela kwiingongoma eziNTATHU kwimpendulo yakho. (3)

ISICATSHULWA 2

'Linye icebo kwedini, kukuba uqhwashe'. Ndenza ngathi andimvanga, ndamjonga apha ebusweni.

'Ukuba usindile ekubanjweni njengokuba sithetha nje kuza kufuneka utsibe imida yeli, ayikho enye indlela. Mfazwe uyayiva le nto ndiyithethayo?'

Kuphela kwento endingazange ebomini bam ndiyicinge le yayithethwa ngumfundisi Hlathi. Yinto endandiza kuyithini le? Ndandiza kuyiqala ngaphi khona ukuyithetha kuBawo noMa? Hayi, kungcono ndibanjwe, ndibone ke ukuba ndiya kuphuma njani etrongweni. Waba ngathi uyayibona into eyicingayo ingqondo yam umfo wakwaThixo.

'Ukuba ukhe wabanjwa, isigwebo siya kuba sinye, kukuxhonywa ukuba akufelanga esiseleni njengoKK. Ngoku aza kuyeka amapolisa ukukufunza ngoFriday, aza kukuzingela ngokwawo sele enegunya eliqinisekisiweyo, uyandiva Mfazwe?'

- 10.11 Kwenzeke ntoni sele esi sithethi simgxagxamisa uMfazwe ukuba makaqhwashe? (2)
- 10.12 Sizathu sini esibangela ukuba uMfazwe abe madolw'anzima xa ecetyiswa ngumfundisi uHlathi ukuba abhace? (2)
- 10.13 Uphele ekhetha liphi iqela lomzabalazo uMfazwe? (1)

- 10.14 Liliphi inyathelo lokuqala ekwakufuneka lithathiwe ukuncedisana noMfazwe koku kubhaca kufuneka ekwenzile? (2)
- 10.15 Ungathi umfundisi uHlathi ngumntu onjani ngokweentetho zakhe kwesi sicatshulwa? Zixhase. (2)
- (25)

AMANQAKU ECANDELO B: 25

ICANDELO C: IDRAMA

IMIYALELO.

- Kweli candelo kubuzwe iidrama ezimbini.
- Kwidrama nganye kubuzwe imibuzo emiBINI, omde nomfutshane ukususela kumbuzo 11 ukuya kumbuzo 14.
- Khetha umbuzo ube mNYE uwuphendule
- **Qaphela :** Ukuba ukhethe umbuzo OMDE kwinoveli, khetha umbuzo OMFUTSHANE kwicandelo C. Ukuba ukhethe umbuzo OMFUTSHANE kwidrama, khetha umbuzo OMDE kwicandelo B. Ubude bombuzo omde buphakathi kwama - 340 nama -390 amagama.

A-a-a JONGUMSOBOMVU NguMkonto B. B.

UMBUZO 11 (Umbuzo omde)

Ingxoxo sesona sixhobo sisetyenziswayo ngumbhali wedrama ekutyhileni umxholo webali. Ngamagama angama-340 – 390, bonisa indlela ayisebenzise ngayo umbhali ingxoxo ukuvelisa izimo zabalinganiswa bakhe, ukubonakalisa ubuzaza bempixano, kwakunye nokusilandela ukuba kuxa sindawoni ngokwesakhiwo sebali.

(25)

OKANYE

UMBUZO 12 (Umbuzo omfutshane)

Fundisisa le ncoko wandule ukuphendula imibuzo.

ISICATSHULWA A.

- MAQOMA:** Nathi sineembedlenge ezibangwe ngala majoni nize nawo apha. Naba bantu ziziqhamo zempatho yaba bantu banini. Ngoku nithi nakugqiba ukubabulala nize kubafaka phantsi kwephiko lam? Ngubani lo nifuna ukuba ashwatyulelwe yiminyanya? Yingxaki yenu leyo. Liyahamba ixesha, sekulithuba ndithe khwelelani nezi mbedlenge zenkohlakalo yenu.
- MSIKA:** Ndifunze mhlekazi ingalo yam iyarhawuzelela.
- KONDILE:** Mhlekezi uNgqika, ndiyaphinda, ndiyakucela ukuba ube nelizwi olenzayo. Kubi xa kunje. Khangela ngoku la majoni nala mabutho ajamelene. Siyayoyika into eza kwenzeka apha. Ubomi bakho nobethu ndawonye neziya ntsana nabaya bafazi ubabonayo phaya busesichengeni. Nceda Mhlekezi, thetha, (*Kwee xum, amehlo onke ebekwe kuNgqika, ngaphandle koMaqoma obesajamelene noKholoneli lowo*)
- NGQIKA:** (*Ephakamisa isandla sakhe kancinci, ekhweba uMaqoma noXhoxho*) Bafo bam, ndiyaphela ngoku. Ngxamani nindigoduse ukuze niye kundicima amehlo kulaa mthonyama. Bendiba niza kundicima kweli cala. Iminyanya iyala ke kuba ndiphawula le nto iqhubekayo ngoku. Yihla mfo wam. (*Ebhekisa kuMaqoma*) Luhlanga olunenzondo olu. Akungelungi ukuba nithi saa xa nijongene nalo. Hambani kunye niye kufuthelana nomntakwenu uTyhali lowa ukuze nibe yimbumba yamanyama naxa sendilele koobawo. (*Ayantywizisa amaTshawe omabini, axhage uyise obeseziphalaza kade iinyembezi*)

- 12.1 Sizathu sini esibangela ukuba uKondile kwintetho yakhe acele uNgqika enze ilizwi ukuthetha nonyana wakhe? (1)
- 12.2 Sebenzisa ulwazi lwakho uxele ukuba kwenzeka ntoni kuMaqoma sele ebonakalisa esi simo nje? (2)
- 12.3 Amazwi athethwa nguMaqoma kwesi sicutshulwa athi, “ngoku nithi nakugqiba nize kubafaka phantsi kwephiko lam” ayinyani na okanye bubuxoki? Zixhase (2)
- 12.4 Umqolo okwwelelwe umgca ngaphantsi ukunika yiphi ingcingane malunga nenkolo kaMaqoma okanye izenzo zakhe? (1)
- 12.5 Xela naziphi na izinto ezintathu kweli bali ezibonisa isimo sentlalo sakwaXhosa mandulo. (3)

- 12.6 Tshatisa umlinganiswa okuluhlu A nendima ayidlalayo ekuluhlu B (3)

A		B	
12.6.1	Kondile	(a)	Iphakathi likaMaqoma
12.6.2	Filiphu	(b)	Umkhosi wemithika
12.6.3	Msika	(c)	Umfundisi owongamele umkhosi wemithika

- 12.7 Igama ‘Busesichengeni’ ngokwendlela elisetyenziswe ngayo kwesi sicutshulwa ingaba lithetha:

12.7.1 Ukuba semngciphekweni

12.7.2 Ukuba phandle ubethwe ngamaqhwa namalanga

12.7.3 Indawo onokukhuseleka kuyo (1)

- 12.8 Cacisa intetho kaMsika ethi; ‘Ndifunze mhlekazi ingalo yam iyarhawuzelela’ (2)
(15)

ISICATSHULWA 2

MAMCETHE: MamCirha, amadoda akafani, afana nje ngeentshebe kuphela. Le yam ke ikhokhobela kum negewangqa layo nje ukuba ndiphazamele kwelo cala lokuyibonisa ngenguquko. Kungoku nje inomkhwa wokuba ingafuni namnye umfazi apha kubafazi bayo ukuba abeke umcondo apha. Lowo ukhe weza umbethela ukumbulala.

NOMKHINI: Hayi bo ! Ixhego elingakaya uthi lingayenza loo nto? Ubawo uNtlane ngathi ngumntu olungileyo nje, ukwazi njani ukuphakamisa isandla? Hayi bo andikholelwa kuloo nto.

MAMCETHE: Ukulunga kona ulunge ngokugqibeleleyo, kodwa uthi nje ukuba uphathe into yeVangeli kuye, uyichamele incoko, abe leliya lona liphethwe emsileni irhamba.

MAMCIRHA: Anjalo onke la maqaba angamadoda ethu. Mna ndiza kusebenzisa nje eli cebo unalo lokuhlalisana ngoxolo nexhego lakho sisi. Kaloku awusenabantu bakuphephela ngoku. Ndibulela nale yokuba ube unje ukuba mhle, ngenene iNkosi inamandla, iyabakhangela abantu bayo.

- 12.9 Nika izinto zibe MBINI azibalulayo. UMamcethe kwintetho yakhe ezinokwenza umbone umyeni wakhe njengandoda yomXhosa yamandulo (2)

- 12.10 Ucinga ukuba kula maxesha indoda enje ngale kaMamcethe ibiya kulunga? Zixhase ngesizathu esivakalayo. (2)

- 12.11 Yintoni ebangela ukuba le ndoda kuthethwa ngayo isuke ibe lugcwabevu ngumsindo kwakuthethwa ngeVangeli? (1)
- 12.12 Inggina ntoni intetho kaMamCirha ethi; 'iNkosi inamandla iya bakhangela abantu 'malunga nenkolo yakhe/icala akulo kule mpixano? (1)
- 12.13 Oku kungafani kwamadoda kubonwa ngala makhosikazi kule ncoko yawo kuthetha ukuthini malunga nenkqubo yawo kwimizi yawo? (2)
- 12.14 Bhala nayiphi na into ocinga ukuba kufuneka igcinwe kule mpatho yabafazi yasendulo. Zixhase. (2)
- (10)
- (25)

OKANYE

UMBUZO 13 (Umbuzo omde)

AMAZA: NguQangule Z. S.

'Impixano luphahla lokwakha iplothi (Isakhiwo), kuxa kukho ukuxambulisana / ukungquzulana phakathi kwezinto ezimbini ezichaseneyo mhlawumbi ngezimvo'. Yayama ngale nkcaza ucazulule impixano egqubayo phakathi kwaba balinganiswa.

- Amaqaba namagqobhoka
- ULizo noZodwa
- USidima noNamhla

(25)

OKANYE

UMBUZO 14 (Umbuzo omfutshane)

Funda ezi zicatshulwa zilandelayo uze uphendule imibuzo elandelayo.

ISICATSHULWA A

PHATHUMZI: Ndandithe isifundiswakazi siyingozi!

WELISILE : Asingomfazi lo!

Umfi wamungunya intlaka efuna ubusi, wasekhumathela esithi luncuthu.

NGXELELO : Wayefuna ifuthe lokhanyo unyana wam.

PHATHUMZI: Ibhabhathane lazitshisa esibaneni lifuna oku khanyandini

THOZAMILE: Luthini uluvo lwamaBhele ngale nto

NGXELELO : Oonokrawuzana bathi amaBhele azizibhaxa ezibini: Izifundiswa zithi makayekwe uMamBhele azibonele, Abengubo bona bathi isiko liyaziwa.

WELISILE : Kuthe kanti sinabancedisi.

PHATHUMZI: Ungatsho mfondini zisekho izifundiswa, mna ndiyaboyika abo bantu! Sakuphoswa kwamantyi singaqondanga.

WELISILE : Umantyi ngokwakhe uyalazi isiko.

PHATHUMZI : Utsho na?

NGXELELO : Makhe siyiyeke leyo madoda,
Esingayisa kumantyi ngaphandle koloyiko yile yokuba uMamBhele
uthwele umgqakhwe!

PHATHUMZI : Bendiba loo nto bubuxoki!

WELISILE : Ezinjalo iindaba andizikholelwa. Ngeze ndizibhale nasentlabathini!

- 14.1 Sebenzisa ulwazi lwakho lwencwadi unike iingongoma zibe MBINI ukungqina obu bungozi bubonwa sisithethi u'Phathumzi' malunga nesi sifundiswakazi. (2)
- 14.2 Caphula apha ebalini nayiphi na into engqina ukuba uNamhla sisifundiswakazi. (1)
- 14.3 Yinyani okanye asiyonyani into yokuba uSidima wayefuna ifuthe lokhanyo ngokutshata kwakhe noNamhla? Zixhase. (2)
- 14.4 Ngokokucinga kwakho umbhali ubenanjongo zini ngokusinika abalinganiswa abamele icala labengubo (amaqaba) nelezifundiswa(amagqobhoka). (2)
- 14.5 Cacisa eli binzana libhalwe ngqindilili. (2)
- 14.6 Igama 'Oonokrawuzana' libonisa:
- 14.6.1 Iindaba ezivakalayo
- 14.6.2 Igama labantu abathile
- 14.6.3 Iindidi zabantu (1)
- 14.7 Ngokwale ngxelo inikwa nguNgxelelo yonookrawuzana ungamayamanisa naluphi udidi lwabantu uWelisile? Zixhase. (2)
- 14.8 Uyavumelana na namazwi akrwelelwe umgca ngaphantsi athethwa sesi sithethi? Zixhase. (3)
- (15)

ISICATSHULWA B

NAMHLA: Ndingumqhovuqhovu nje
 Kukubonelwa isoka
Ndiyingcathalala nje
 Kukulotyoliswa ngesinyokotho
Ndiyimbikila nje
 Kukwendiswa ngogonyamelo
Ndingumcinga nje kukutshatiswa ngebhaxa!

VATHISWA: Bonke abafazi bayantlithantlitheka
 Akungowokuqala nakanye!
 Akukakhululi nezila lendoda yakho
Kodwa sekukhula itshungu emzini wayo!
 Inene kuza unxunguphalo, kuza ishwangusha

NAMHLA: Zingavuka iinkqwithela, zingawa izichotho
 Ingagquma imilambo, angadlokova amaza
 Konke, konke, konke kobetha kudlule
 Asale uLizo eliwele lam lomphefumlo

VATHISWA: Andithethi ke mna nokruxeshe oneenkani
 Andixoxi mna nooPhikisa abakade bebona
 Andilibambi ikakade lam
 nooTyhobek'emahlahleni

NAMHLA: Ndithi kuwe kukufa kodwa okwawundahlula noLizo

- 14.9 Amagama abhalwe ngqindilili azoba mfanekiso ntelekelelo mni? (1)
- 14.10 Ingaba lo mfanekiso awuzobayo ngaye uNamhla ubangelwa yintoni? Nika isizathu ukuzixhasa. (2)
- 14.11 Cacisa intetho ekrwelelwe umgca ngaphantsi ngokunika intsingiselo ethe ngqo nefihlakaleyo. (2)
- 14.12 Uphawu lwesikhuzo kwintetho kaVathiswa enomgca ngaphantsi lubonisa ntoni? (1)
- 14.13 Nika imizekelo ibe MIBINI ngokwalapha kwisicatshulwa ebonisa iimbandezelo neenkxwaleko ezingenakumahlula uNamhla noLizo. (2)
- 14.14 Amazwi kaNamhla athi, 'Ndithi kukufa kodwa okwandahlula noLizo', azalisekiswa na? Zixhase. (2)
- (10)

AMANQAKU ECANDELO C: 25

AMANQAKU EWONKE: 80

Akuvumelekanga ukufotokopa eli phepha

